

Turitg: Dieta rumantscha cun frust e gust

Il tema mort na ha betg chattà tant interess, persunter il parlament rumantsch

■ (anr/vi) L'avantmezdi han ins analisà «la mort dal rumantsch». La sonda suentermezdi èn ins levà da mort en vita. In parlament per ils Rumantschs ha chattà grond interess tar ils participants da la dieta a Turitg. L'URB ha envidà e radund 30 persunas èn vegnidas en il «Au premier» da la staziun principala. L'interessanta part da la dieta ha cumenzà il suentermezdi cura che la studenta da sociologia *Eveline Nay* ed il president da la Romania *Martin Cabalzar* han ditg co ch'i duess ir vinavant cun il rumantsch.

Plaschair empè dad incumbensa

Nay ha scurlattà la dieta ord ils patratgs moribuns da l'avantmezdi. La Rumantschia possedia memia bleras structuras sterias e monumentalas, ha ella ditg. La Lia rumantscha ed uniuns affiliadas sco la Romania sajan memia lunsch davent da la gliעד. Las structuras rumantschas sa basian sin regiuns e religiuns.

Ma ozendi s'orienteschian ins pauc tenor ina religiun. Ins na s'identifitgeschia era betg pli uschè fitg cun la regiun. Auters interess, sco p. ex. musica, sport, litteratura, viadis gioghian ina pli gronda rolla. En talas interessenzas stoppia il rumantsch daventar preschent.

La Romania saja surdumandada sch'ella veglia promover il rumantsch. Per cuntanscher questa finamira stuess ella esser preschenta sin via. Perquai plescha *Nay* da schliar si las structuras veglias. Sch'ella giaja en sortida a Laax, haja ella gia constattà che ses collegas hajan ina schleta cunscienza, sch'els na discurren betg uschè bain rumantsch. «Il rumantsch na fa betg pli plaschair, mabain è daventà in'incumbensa.» *Nay* plescha per dapli gust e plaschair.

Idea concreta

Las ideas concretas ha suenter *Martin Cabalzar* purschì. Il president da la Romania ha raquintà da las propostas ch'il Cumin da Mustér ha formulà il novem-

ber. Ina da quellas è in parlament rumantsch che represchenta meglier la basa.

«Nus Rumantschs essan in pievel surorganisà», ha *Cabalzar* admonì. Sch'ins less crear in parlament, stuessan ins abolir las uniuns veglias. La suprastanza da la Romania fiss p. ex. pronta da schliar l'atgna uniun per far plaz ad in parlament. Lez pudess sa cumponer da «geraus» culturals ord las vischnancas ed ev. dals deputats rumantschs dal cussegl grond. Era ils Rumantschs avessan ina tscherta represchentanza. Il parlament saja gia vegnì postulà avant diesch onns. Fin uss na saja il chantun betg entrà sin l'idea. «Quai n'è nagina raschun da trair la faultsch en il chanvà», ha ditg *Cabalzar*.

In parlament rumantsch evitass ch'ils deputats tudestgs decidan cun lur maioritad adina las fatschentas rumantschas en il cussegl grond.

Sper il parlament duessan vegnir rinforzads trais centers regiunals (Surselva, Engiadina, Grischun central). Quels surpigliassan la lavur da las uniuns affiliadas.

Lia rumantscha para cuntenta

«Midadas radicalas èn politicamain betg pussaivlas en il Grischun», ha *Gion A. Derungs*, il secretari da la Lia rumantscha, ditg a la fin da la dieta. «Ma i dat l'evoluziun.» En ses votum n'è el betg entrà sin il «parlament rumantsch». Ils Grischuns sajan in pievel e possedian be ina struttura politica. Perquai decidia l'entir Grischun davart il rumantsch grischun. En fatgs da scola regia l'autonomia da vischnanca. «Nus lain tscherts dretgs da condecisiun.» Per la Lia rumantscha saja la struttura cun ils deputats rumantschs en il cussegl grond dentant suffizienta.

Vita privata e mort dal rumantsch

L'avantmezdi è stà deditg al tema mort. *Cristian Kober*, l'iniziant da la dieta, ha



Mintgin ha dà agens accents a la dieta: **Cristian Kober, Martin Cabalzar e Daniel Candinas.** FOTO C. CADRUVI

rimnà bleras chartas da lecturs che tractan la «mort dal rumantsch». Questas chartas ha el ordinà tenor ils stadis che *Elisabeth Kübler-Ross* ha definì tar ina persuna moribunda. Ils medems stadis ha *Kober* era chattà en las chartas da lecturs. Per part ha *Kober* constattà che la gliעד projectescha experientschas privatas en «la mort dal rumantsch». Temas e depressiun che na hajan betg da far cun la lingua, mabain cun la vita privata, cumparian en plirs texts.

En l'invit a la dieta ha *Kober* era scrit: Il discurs da la mort dal rumantsch giaja a pèr cun l'introducziun dal rumantsch grischun. Quest discurs «signalisescha ina bloccada da la Rumantschia».

Litteratura

La dieta ha era purschì trais pitschnas excursiuns en la litteratura, l'architettura ed il film. *Marianna Blöchlinger-Spe-scha* ha referì davart «La mort en il glatscher» dad *Andri Peer*. En quest'istorgia

croda in chatschadur en ina sfendaglia. Là cumenza la mort a discurre cun il giuven che reponderescha en sia anguscha sia vita.

Curt avant ch'il fraid mazza il giuven, auda el da la vusch da ses camerat che vegn en agid. *Blöchlinger* ha cità in autur rumantsch «In pievel viva, sch'el vul viver». Era sche la cuminanza rumantscha vegnia pli pitschna, dependia la fin finala era bler da la qualitat dal rumantsch e na sulet da la quantitat.

Architettura

Anita Simeon ha dà intgins impuls ord l'architettura. Las piramidas da l'Egipta e blers mausoleums sin quest mund sajan enconuscents bajetgs da la mort. L'architect *Gion A. Caminada* haja stgaffì cun la stiva da morts a Vrin in bajetg che chattia gronda atenziun. Cun la stiva da morts haja *Caminada* cunzunt resguardà ils basegns dals vivs che prendian cumia, veglian star da cuminanza enturn la bara, sa discurre u

forsa schizunt rir. A la fin ha *Simeon* preschentà in santieri da la Scandinavia – in grond parc cun aria e spazi.

Ils Rumantschs na dovrian betg in mausoleum, mabain aria. Els duessian rir dapli che temair la mort, è stà il votum da l'architecta.

Film erotic e sexy

Il cineast *Daniel Candinas* ha mussà dus films. Entant che l'emprim è sa fatschentà cun la mort, cuntegniva il segund bler sprez. Il film ha concludì la dieta. El ha mussà ch'il cineast rumantsch lavura cun gust. *Candinas* sa basa en il film «Uorschin» sin il cudesch d'uffants da *Selina Chönz* ed *Alois Carigiet*. Ma empè dad ina plumpa va l'Uorschin modern per in spertezza auto si mises. Cun quel auto – ina maschina che fa traglischar ils egls da tuts fans dad autos – vul el gudagnar la cursa. E sa chapescha il grond premi. Lez è ina sexi giuvna che litga plain passiun erotica in tschitsch da zutger.